

# INUIT ATAQATIGIIT

## INATSISARTUNI



Nuuk, 23. maj 2013

Inatsisartut Suleriaasianni § 37 naapertorlugu Naalakkersuisunut imaattunik apeqquteqar-punga.

(Inatsisartuni ilaasortaq Naja Nathanielsen, Inuit Ataqatigiit)

### Apeqqutit:

1)

Naalakkersuisut isumaqarpat, aatsitassanit isertitat nassuiaataat, tak. Kalaallit Nunaata Aatsitassarsiornermi Aningaasaateqarfia pillugu inatsimmi § 3, imm. 3 aamma Namminersorneq pillugu inatsimmi § 7 tamakkiisumik imminnut naapertuuttut? Taamaanngippat Naalakkersuisut sukut assigiinngissuteqarnerannik isumaat allaasereqquneqarpoq.

2)

Naalakkersuisut naliliinerat naapertorlugu akileraarutit A-t sulisut aatsitasarsiorfinni Nunatsinni aatsitassarsiornermi sulinerannut atatillugu akilerneqartut aatsitassanit isertitanut ilaappat, tak. Kalaallit Nunaata Aatsitassarsiornermi Aningaasaateqarfia pillugu inatsimmi § 3, imm. 3-mut oqaaseqaatit?

3)

Naalakkersuisut isumaqarpat atortut tigussaasut, soorlu uuliakoorneq akiorniarlugu atortut, timersortarfik, imarpik qulaallugu timmisartunut mittarfik, tak. Namminersorneq pillugu inatsimmi § 7 aamma/imaluunniit Aatsitassarsiornermi Aningaasaateqarfik pillugu inatsimmi § 3, imm. 3, aatsitassanit isertitanut ilaassasut, taakkua aatsitassarsioqatigiinnit IBA-mik isumaqatigiissuteqarnermut atatillugu pissarsiarineqarsimappata allatigulluunniit ingerlatseqatigiiffiup misisueqqaarnissamut aatsitassanilluunniit atuinissamut akuersissutaanut ilaappata?

4)

Apeqqut 3 "aap"-imik akineqarpat, ilisimatitsissutigeqquneqarpoq, taamaappat uuliakoorneq akiorniarlugu atortut Cairnimit tunniunneqartut nalingat Naalakkersuisut qanoq naatsorsorniarneraat, tamannalu Nunatta Karsiata 2012-imut naatsorsuutaanni qanoq ersissanersoq?

5)

Aatsitassarsiornermi Aningaasaateqarfik pillugu inatsimmi § 50-ip nassatarisaanik ukiuni kingullerni tallimani aatsitassanit isertitat takussutissiaralugit saqqummiuteqquneqarput, ersersillugu aatsitassanit isertitat ukiut tamaasa naatsorsorneqartassasut Nunattalu Karsiata naatsorsuutaanut ilaassasut.

6)

Nunatta Karsianut kukkunersuisunit oqaaseqaatini qallunaatuuni qup. 906-imi aatsitassarsiorneq Namminersorneq pillugu inatsisip ilaatut isigalugu aatsitasarsiornermit isertitat katinnerat taamaallaat innersuunneqarput. Naalakkersuisut naliliinerat naapertorlugu, siunissaq eqqarsaatigalugu siunertamut naapertuuttuunerussanerluni aatsitassanit isertitat Nunatta Karsiata naatsorsuutaanni immikkuuluannerusunngorlutik suliarineqartalerpata, taamaalilluni Kalaallit Nunaata Aatsitassarsiornermi Aningaasaateqarfia pillugu inatsimmi § 50 piviusunngortinneqarsinnaaleqqullugu?

7)

**Apeqquut 3 "aap"-imik akineqarpat, uuliakoornelut akiorniarlugu atortut 5 mio. kr sinnerlugit naleqartinneqarpata, aamma Nunatta Karsiata 2012-imut naatsorsuutai Inatsisartunut akuerineqarpata, ima paasivara, Kalaallit Nunaata Aatsitassarsiornermi Aningaasaateqarfia pillugu inatsit 1. januar 2014 atuutilissasoq. Naalakkersuisut periarfissatut isigavaat, 2014-imut aningaasanut inatsimmi oqaaseqaatitigut imaluunniit 2013-imut Tapiissutaasumik aningaasaliinermut inatsikkut, Aningaasaqarnermut Ataatsimiititaliap akuersineratigut, Kalaallit Nunaata Aatsitassarsiornermi Aningaasaateqarfia pillugu inatsisip atuutilernissaanik aalajangersakkami sanioqqutitsisinnanermik aalajangersakkamik ilanngussisoqarnissaa? Taamaaliornikkut 2014-ip ingerlanerani inatsimmi aatsitassanik isertitat nassuiaataannik allannguutissamik akuersinissaq piffissaqarfineqassagaluarat, tamatumalu kingorna ingerlassat timitallit aatsitassarsiornermi aningaasaateqarfimmut atatillugu aatsitassanik isertitanut ilaatinneqassarlutik.**

### **Tunngavilersuut:**

Isumaqarpunga "aatsitassanik isertitat" Namminersorneq pillugu inatsimmut uagullu nammineq aatsitassarsiornermi aningaasaateqarfisinnut naleqqiullugu eqqortumik nassuiaataat atoriaannaasumik erseqqissuseqanngitsoq. Isumaqarpunga Namminersorlutik Oqartussat aatsitassanik isertitaasa naatsorsorneranni isertitat suut ilaassanersut erseqqissarnissaat pisariaqartinneqartoq. Annermik pineqarpoq ingerlassat tigussaasut suut ilaatinneqarnissaat pillugu apeqquut. Apeqquut tamanna soqutiginarsivoq uuliasioqatigiiffik Cairn IBA-mik isumaqatigiissummut atatillugu uuliakoornelut akiorniarlugu Nunatsinni atortuiliinissaanik peqquneqarmat. Aningaasanik nalillit taakku piginneqatigiiffimmut nutaamut Greenland Oil Spill Response Limited-imut tunniunneqarput, taannalu tamakkiisumik Namminersorlutik Oqartussanik pigineqarpoq. Naalakkersuisut siulii isumaqarput assersuutugalugu uuliakoornelut akiorniarlugu atortut Namminersorneq pillugu inatsimmut aamma Aatsitassarsiornermi Aningaasaateqarfimmut naleqqiullugu isertitatut isigineqassasut. Taama isumaqarneq ippinnartoqanngitsuunngilaq, tassami atortumik nutaajulluni allatut naleqariarluni ukiuni tulliuuttuni nalikilliarortumik – aningaasatigullu toqqaannartumik iluanaarutaasussaannngitsumik - naliliinissaq ajornakusoorsinnaavoq. Maannamut periusiusut nassataraat assersuutugalugu timersortarfik uuliasioqatigiiffimmi IBA-mik isumaqatigiissutip ilaatut Aasiannut tunniunneqartoq, aatsitassanik isertitatut naatsorsuunneqassammat. Aamma timersortarfik taanna ukiuni tulliuuttuni aserfallatsaalineqarnissani nalinginnaasumillu ingerlanneqarnini pissutigalugit nalikilliarortaluarpuunniit, aammalumi aningaasartuutit kommunimit akilerneqassasut ilimagisariaqarput Namminersorlutik Oqartussanik akilerneqaratik. Ersarilluinnarpoq timersortarfiup taamaattup maannakkorpiaq nalingata ukiumi tassani aatsitassanik isertitanut ilaatillugu naatsorsuunnissaa - Kalaallit Nunaata Aatsitassarsiornermi Aningaasaateqarfia pillugu inatsisip atuutilernissaanik naliliinissaq siuner-taralugu, tak. § 50 - isumaqanngitsoq. Tamatuma saniatigut IBA-mik isumaqatigiissutit naammattumik iluanaarutiginnngitsoorsinnaavagut, eqqarsaatiguarataratsigu, isumaqatigiissutit immikkoortui assigiinngitsut naggataatungaani danskit naalagaaffianit tapiis-sutisiatta ilanngarneqarnerinik nassataqassanersut, tak. Namminersorneq pillugu inatsimmi § 8.

Qinnutigeriissavara apeqquutit tamarmik ullut suliffiit qulit qaangiutsinnagit akineqassasut.